



REPUBLIKA E KOSOVËS / REPUBLIKA KOSOVA

GJYKATA THEMELORE PRISHTINE - DEGA E GJYKATËS FUSHË KOSOVE

Numri i lëndës: 2022:199178

Datë: 26.03.2024

Numri i dokumentit: 05505412

P.nr.2873/22

NË EMËR TË POPULLIT

GJYKATA THEMELORE NE PRISHTIË – DEGA FUSHË KOSOVË - Departamenti i Përgjithshëm, Divizioni Penal, sipas Gjyqtares Laura Hoti Statovci, me pjesëmarrjen e bashkëpunëtorit profesional Albrim Kastrati, në lëndën penale të akuzuarit L. H. nga O., i akuzuar për veprën penale në bashkëkryerje Vjedhje e rëndë nga neni 315 par 1 lidhur me nenin 31 të KPRK-së, duke vendosur sipas aktakuzës së Prokurorisë Themelore në Prishtinë – Departamenti i Përgjithshëm PP/II.nr.2897/22 të datës 31.10.2022, në seancën e shqyrtimit fillestar publik të mbajtur me datë 08.03.2024, në praninë e Prokurorit të Shtetit Kushtrim Zeka, të akuzuarit L. H. me mbrojtësin e tij sipas detyrës zyrtare av. Sazana Maloku, me datë 11.03.2024 mori dhe publikisht shpalli ndërsa me datë 26.03.2024 përpiloi këtë:

A K T G J Y K I M

I akuzuari L. H., i biri i B. dhe nëna L., e gjinisë B., i lindur me, në Obiliq, me vendbanim në rrugën “M. T.” në O..... me numër personal, të dhëna këto të vërtetuara nga dokumenti i letërnjoftimit të lëshuar nga MPB, ka të kryer shkollën e mesme, i pa martuar, i gjendjes së mesme ekonomike, Shqiptar, Shtetas i Republikës së Kosovës.

ËSHTË FAJTOR

Sepse:

Me datë 22.06.2022 rreth orës 01:00 pas mesnate në rrugën “W....” në O., përkatësisht në parkingun e auto-servisit afër “A...”, i pandehuri L. H. pas marrëveshjes paraprake dhe në bashkëkryerje me të miturin B. A., me dashje dhe me qëllim të përvetësimit të pasurisë se huaj të luajtshme vetit ti sjell përfitim të kundërligjshëm pasuror, i njëjti ka shkuar në lokacionin e lartcekur, ashtu që nga kamioni me targa ...-...-.. pronë e tani të dëmtuarit J. A., ku me përdorimin e forcës dhe me një kaçavidë të cilën e ka gjetur aty ka arritur ta liron kapakun e rezervuarit të kamionit dhe pastaj të nxjerrin rreth 100 litra naftë, të cilat i kanë nxjerrë nga rezervuari duke përdorë një gyp të plastikës dhe më pas naftën e nxjerrë nga rezervuari e kanë vendosur në katër bidon me nga 20 litra naftë dhe në dy bidon tjerë nga 10 litra naftë, ku më pas i njëjti së bashku me të miturin e lartcekur i bartin bidonët me naftë duke u larguar nga vendi i ngjarjes në drejtim të panjohur pa u vërejtur nga askush, e cila naftë të nesërmen gjendet tek një lokal te shtëpia e të miturit B. A. , me ç ‘rast të dëmtuarit i shkakton dëm material,

- *Me këtë i pandehuri në bashkëkryerje me të miturin ka kryer veprën penale Vjedhje e rëndë nga neni 315 par.1e lidhur me nenin31 të KPRK-së.*

Andaj, gjykata në bazë të nenit të lartcekur dhe neneve 4, 7, 8, 9, 10, 17, 21, 31, 38, 39, 40, 43, 48, 69, 70, 71, 72 dhe 315 të KPRK-së dhe neneve 358, 359, 360 dhe 364 të KPPRK-së, të akuzuarin e:

GJYKON

- I. Me dënim me kusht ku dënimin me burgim në kohëzgjatje prej 1 (një) viti i pandehuri nuk do ta mbaj, nëse në periudhë kohore prej 1 (një) viti nuk kryer veprë të re penale dhe
- II. Me dënim me gjobë në shumën prej 700.00 (shtatëqind) Euro te cilin dënim i akuzuari është i obliguar që ta paguaj në afat prej 60 (gjashtëdhjetë) ditësh, nga dita e plotfuqishmërisë së këtij aktgjykimi.
- III. Nëse i pandehuri dënimin me gjobë nuk e paguan në afat të caktuar më lartë, atëherë gjykata këtë dënim do ta zëvendësoj me dënim burgu në kohëzgjatje prej 35 (tridhjetë e pesë) ditësh, duke llogaritur një ditë burgim me 20 (njëzetë) euro të gjobës
- IV. Obligohet i akuzuari që në emër të shpenzimeve të procedurës gjyqësore të paguaj shumën prej 20 (njëzet) Euro në emër të paushallit gjyqësor, si dhe shumën prej 20 (njëzet) Euro në emër të kompensimit të viktimave të krimit, të gjitha këto në afat prej 60 ditësh nga dita e plotfuqishmërisë së këtij aktgjykimi.
- V. Pala e dëmtuar J.A., me adresë në rrugën “N... G.” nr.48, Komuna e O..., për realizimin e kërkesës pasurore-juridike, udhëzohet që ta realizon në procedurë të rregullt civilo-juridike.

A r s y e t i m

Prokuroria Themelore në Prishtinë - Departamenti i Përgjithshëm, ka paraqitur Aktakuzë PP/II.nr.2897/22 të datës 31.10.2022, ndaj të akuzuarit L. H. për shkak të dyshimit të bazuar mire se në bashkëkryerje ka kryer veprën penale Vjedhje e rëndë në tentativë neni 315 par 1 lidhur me nenin 31 të Kodit Penal të Republikës së Kosovës (KPRK-së, 06/L-074).

Gjykata lidhur me këtë çështje penale ka mbajtur seancën e shqyrtimit fillestarë me datë 08.03.2024 në praninë e prokurorit të shtetit Kushtrim Zeka dhe të pandehurit L. H. me mbrojtësin sipas detyrës zyrtare Sazana Maloku ku pas leximit të aktakuzës nga prokurori i shtetit i pandehuri u deklarua se e pranojnë fajësinë për veprat penale për të cilat akuzohet sipas aktakuzës.

Pas deklarimit të pandehurit dhe mendimit të prokurorit se nuk e kundërshton pranimin e fajësisë, Gjykata konstatoj se i pandehuri ka pranuar fajësinë në mënyrë vullnetare dhe pa asnjë presion, i pandehuri është i vetëdijshëm për pasojat e pranimin të fajësisë, si dhe të gjitha kërkesat nga neni 248 par. 1 të KPPRK-së janë përmbushur. Ashtu që gjykata aprovon deklarimin për pranimin e fajësisë nga ana e të pandehurit.

Duke pas parasysh se gjykata ka aprovuar pranimin e fajësisë nga ana e të akuzuarit dhe ka vërtetuar se nuk ekziston asnjë rrethanë nga neni 357 par.1 pika 1.1, 1.2 dhe 1.3 të KPPRK-së, si dhe faktin se janë plotësuar kushte nga neni 242 par. 6 lidhur me par. 2 të KPPRK-së, atëherë në këtë çështje penale nuk është zbatuar procedura e provave, por gjykata pas deklarimit të

akuzuarve se e pranojnë fajësinë në kuptim të nenit 242 par. 6 të KPPRK-së ka vazhduar me shqiptimin e dënimit.

Me faktet e ofruara në shkresat e lëndës, e po ashtu me pranimin e fajësisë nga ana e të pandehurit është vërtetuar gjendja faktike si në dispozitiv të këtij aktgjykimi. Nga gjendja e vërtetuar faktike si është përshkruar në dispozitiv të këtij aktgjykimit, rrjedh se në veprimet e të pandehurit L. H. qëndrojnë të gjitha elementet e veprës penale Vjedhje e rëndë nga neni 315 par 1 të KPRK-së.

Sa i përket fajësisë gjykata ka gjetur se i akuzuari e ka kryer veprat me dashje, ndërsa gjatë procedurës penale nuk janë paraqitur rrethana të cilat do ta zvogëlojnë apo përjashtojnë përgjegjësin penale të akuzuarit, kështu që i njëjti është penalisht përgjegjës.

Duke vendosur lidhur me llojin dhe lartësinë e dënimit, gjykata i ka vlerësuar të gjitha rrethanat lehtësuese dhe rënduese në kuptim të nenit 70 të KPRK-se. Kështu si rrethana lehtësuese për të akuzuarin, gjykata ka vlerësuar faktin se i akuzuari ka treguar sjellje korrekte gjatë shqyrtimit gjyqësor duke pranuar fajësinë, duke u ndier i përgjegjshëm për veprimet e tij dhe duke shprehur keqardhje për veprat që e ka kryer, po ashtu gjykata si rrethanë lehtësuese ka vlerësuar edhe moshën e re të pandehurit me rastin e kryerjes së veprës penale të gjitha këto rrethana kjo gjykatë i ka pranuar si rrethana lehtësuese në dobi të akuzuarit. Ndërsa si rrethana rënduese gjykata nuk gjeti.

Andaj, duke vlerësuar këto rrethana, Gjykata në kuptim të nenit 43 dhe 48 të KPRK-se të akuzuarin e gjykoji si në dispozitiv të këtij aktgjykimit, me të cilin do të arrihet edhe qëllimi i dënimit.

Gjykata ka ardhur në përfundim se dënimi i shqiptuar të akuzuarit është në përputhje me shkallën e përgjegjësisë penale të tij dhe me intensitetin e rrezikimit të vlerave të mbrojtura të shoqërisë. Gjykata gjithashtu është e bindur se vendimi mbi dënim do të shërbejë për arritjen e qëllimit të dënimit në pengimin e të pandehurit në kryerjen e veprave penale në të ardhmen veçanërisht llojin e njëjtit të veprës penale, por ai do të ndikojë edhe si preventive e përgjithshme për personat tjerë që të përmbahen nga kryerja e veprave penale në përputhje me nenin 38 të KPPRK-se.

Duke u bazuar në nenin 449 par. 2 pika 2.6 dhe 452 par.1 të KPPRK-se si dhe në bazë të nenit 36 par.3 nën par. 3.1 të Ligjit për kompensimin e viktimave të krimit nr.08/L-109, Gjykata ka vendosur për shpenzimet e procedurës penale në shumën e përgjithshme prej 40 Euro.

Nga arsyet e cekura më lartë dhe me zbatimin e nenit 364 të KPPK-së është vendosur si në dispozitiv të këtij aktgjykimi.

GJYKATA THEMELORE NË PRISHTINË-DEGA FUSHË KOSOVË,
DEPARTAMENTI I PËRGJITHSHËM PENAL
P.nr.2873/22 datë 26.03.2024

Gjyqtarja e vetme Gjykuese

Laura Hoti Statovci

KËSHILLA JURIDIKE: Kundër këtij aktgjykimi palët kanë te drejtë të parashtrojnë ankesë në afat prej 30 ditësh, nga dita e pranimit të njëjtit. Ankesa i dërgohet Gjykatës së Apelit në Prishtinë përmes kësaj Gjykate.